

Petrus de Vinea

*Ep. II 25 (Scimus, et longi  
temporis experimento didicimus...)*

Basilicata University Press

—

*Digital Humanities*

Edizioni e data-bases digitali  
sotto la direzione di Fulvio Delle Donne

Petrus de Vinea

*Ep. II 25 (Scimus, et longi  
temporis experimento didicimus...)*

1249

Ezelino, scribens ei, quod uiuit et fatigatus laboribus requiescit in Regno.

1. Scimus, et longi temporis experimento didicimus, quod a consuetudine, quae iam in te naturae uim obtinet, prescripta longi temporis spatio, tuae mentis maturata deuotio, natiuis erecta potentiis, declinare non possit. 2. Scimus, quod uergentis in senium tuae deuotionis auctoritas, quantumlibet tibi pruinosa senescat in corpore, uirtuosa uerumptamen iuuenescit in mente. 3. Scimus, quod ardor tuae fidei annorum uetustate non desipit, nec annorum spatia fastidita confringunt, sed quanto plus in tempore labitur, tanto fructus placidiores adducit. 4. Scimus, quod, licet a nobis interdum locorum situs te corpore diuidat, corde tamen et animo maiestatis nostrae presentiam intueris, dum statum nostrum prosperum uotiuus per litteras expetis, et per nuntios ministeriosus exquiris. 5. Ecce igitur consona uotis tuis noua describimus, quod, fauente nobis diuina clementia, prospere uiuimus et corporis nostri membra, bellicis hactenus fatigata laboribus, deliciosa Regni nostri dulcedine restauramus. 6. Illo nichilominus non obmisso, quin ad pacificandum statum fidelium et rebellium reliquias conterendas, ex curis nostris, quas excitat sollicitudo prosperior, uigilias continuas exercere curemus.